

生雞卵的無，放雞屎的有

傳統社會，去人兜的禮物叫做伴手，嘛會當叫做等路。

因為古早人出門，步輾為主，手 kuann7 物件，毋但有一 e5 伴，閣有一種踏實的感覺，感覺著主人兜的囡仔，等佇路口，期待人客去，期待人客帶好食、好 tshit4tho5 的物件去的模樣，做人客的當然嘛一直起毛場起來。

到人兜了，主人會當先享受你帶去的伴手、等路，你嘛會當對伴手、等路開始話起，氣氛輕鬆、歡喜，避免一踏入門著講主題的礙虐，而且主人若請 lim1 茶、請食四秀仔，抑是請食飯，你嘛較袂有彼種偏人傷濟的歹勢。

人咧講，有來有去。你去人兜，帶一 e5 仔伴手；人來恁兜，帶一 e5 仔等路，禮儀禮儀以外，閣會當享受「恁都無的阮兜有、阮兜無的恁兜有」的物件交換，這是一種新鮮、多元閣自然的人際滿足、快樂和幸福。

毋過有一種人，去人兜逐擺都空手戽蝦，欲 thun2、欲踏、欲食、欲 lim1，延遲人的時間，閣無任何的幫助，難免顧主人怨，予主人譬相講：「這 e5 人啊，生雞卵的無，放雞屎的有！」